

Cooperazion territorièla, per lurèr adum sorafora i confins

L Dreierlandtag, la radunanza di Consees de Trentin, Sudtiroi e Tirol adum, à segnà n gran vèrch sul percors de colaborazion anter la Regions de la Èlpes

Istituzioni - Ai 29 de otober se à tegnù a Mezzocorona tel Trentin l Dreierlandtag, la sentèda di consees de la provinzie de Trent, de Busan e del Land Tirol adum, col Vorarlberg desche osservador, per portèr dant la costions che revèrda i teritories de la comunitàdes de la Èlpes e per chierir adum neves strumenc de colaborazion interregionèla anter popolazions leèdes da rejons storiches, culturèles e economiches, per aer più peis e forza tel chèder european.

La scontrèda vegn metuda a jir ogne doi egn e l'endrez vegn tout sù a roda dai raions enteressè; 2 egn dò da l'ultima scontrèda stata a Dispruch, chest an ge pervegnia al Consei de la Provinzia autonoma de Trent endrezèr la scontrèda numer 9 e ge dèr alberch ai lurieres de chest organism.

E chest apuntament à segnà n moment dassen emportant del percors de arvejinament che va inant dal 1991, ajache a Mezzocorona la Radunanza à aproà duta a una na mozion che permet de strenjer neves leames de cooperazion tel ciamp aministratif anter i goern del Trentin, del Sudtiroi e del Tirol, travers l GECT, Grop European de Cooperazion Teritorièla, n strument pervedù da pech da la legislazion europeèna per jir envers na Europa de la Regions enveze che di Stac nazionei.

Sun proponeta di Presidenc di 3 Consees de Trentin, Sudtiroi e Tirol, Kessler, Steger e van Staa, la jontes di trei Länder cognarà lurèr fora tel temp de n an l document che envia via la istituzion del GECT. Chest sarà n organism autonom con na sia personalità giuridica, con n esecutif e na radunanza che ge permetarà a la



trei Regions de portèr inant adum projec de enteress per duc, realisan cossi contretament chela colaborazion che da n pez vegn chierida anter i trei teritories.

La colaborazions sora i confins fora podarà tocèr anter l'auter l setor de l'energia, dajan l met de desfrutèr la ressors de la regions vejines se no n fossa più a la leta daite dai confins; de la sanità con l met de fèr convenzions anter enc publics e privac che anché no te duta la trei Regions é possiboles; i trasport, con l potenziament di coleamenc anter Dispruch e Lienz, donca ence con Sudtiroi e Trentin, e etres setores emportanc per i trei teritories, desche l turism e l'economia.

24 mozions per aer maor forza te l'Europa

Dò chest prum e emportant vèrch, la Radunanza di tei Consees a Mezzocorona à tout dant etres 24 documenc che empegna a tor scomenzadives te setores desferenc che revèrda dut l raion: setor istituzionèl; attivitàdes economiches, ambient e fontènes energetiches; trasport e circolazion;

cultura, istruzion e ennescida; politiches sozièles e lurier.

Ti intervenc l'é stat uzà fora anter l'auter l'emportanza de la tutela e valorisazion del patrimoniè cultural, linguistich e identitarie de la popolazions che vif te la Regions, l besegn de smaorèr la cognoscenza di lengac vejins e de sostegnir i scambies culturai anter la regions a ogne nivel, da la scola primèra a l'università: l'é stat proponet ence de lurèr fora na storia "adum" per dut l raion.

Tel setor de trasport e circolazion l'é stat domanà na strategia concordèda per passèr pian pian dal trasport sun goma a chel sun scina e palesà l besegn de spenjer per la realizazion del tunel del Brenner. Maor coordinament l'é stat domanà per chel che vèrda la tarifes de strèdes e autostrèdes, per uniformèr la segnalazion di troes te la trei regions, per la normes de segurezza sui portoes da schi; strategies unitères per responder a besegnes sanitères e sozièi e per la prevenzion de azidenc sun strèda, infortunies sul lurier e problemes desche la mèldoranza da alcol. Amò l'é stat proponet l'istituzion de na "sentèda adum per i joegn" per tor dant i problemes specifichs de chel setor, e l'é stat proponet scomenzadives da portèr dant a sostegn de l'agricoltura da mont e di prodoc locai, del sparagn energetich, de na promozion turistica en sinergia del teritorie alpin-dolomitich-tiroleis.

Luigi Chiocchetti: strategies unitères per l turism

Più avisa sul tem del turism e sul besegn de na promozion unitèra é jita ence la mozion prejentèda



Momenc de la scontrèda endèna l Dreierlandtag a Mezzocorona. Tel retrat a cencia l conseier ladin Luigi Chiocchetti.

dal conseier fascian Luigi Chiocchetti. L raprezentant politich de la Ual à portà dant l besegn de na colaborazion che deide a valorisèr l turism da mont, attività che la Convenzions de la Èlpes conscidra de enteress public, fontèna de sosten-tament per sia popolazion, ma che à da vegnir portèda dant con atenzion a la calità di servijes, a l'ambient, a la vivibilità de la jent e a la biodiversità.

Te sia mozion Chiocchetti à proponet strategies de svilup unitères che cognessa tocèr desvallives setores, e en particolar: la mobilità, tant daite da la valèdes che tel coleament envers i teritories vejins, con soluzions bones per l ghest ma ence per l'ambient; la valo-

risazion de l'ambient e de la cultura da mont, con si valores arjunc locai de storia, lengaz, artejanat e prodoc gastronomic; la formazion e la sensibilisazion di operadores turistics; la promozion turistica ti media. (lg)

